

BERITA HARIAN, ISNIN, 8 MAC, 1982

## LAWATAN MAHATHIR MEMBINA KERJASAMA

PAGI Jumaat lalu Perdana Menteri mengakhiri lawatan rasminya yang pertama ke Teluk Parsi. Dari kenyataan beliau sendiri kesan lawatan ini adalah lebih besar dari semata-mata memperbaiki pengetahuan kita mengenai keadaan pembangunan di negara-negara Teluk dan merapatkan hubungan persaudaraan antara kita yang telah sedia terjalin. Dari sambutan baik yang diberikan kepada Perdana Menteri dan rombongannya oleh setiap pemimpin utama negara-negara yang dilawati itu jelaslah bahawa hasrat merapatkan hubungan melalui jalinan kerjasama yang lebih berkesan dan bermakna adalah saling dirasa dan dihargai.

Kita harap hasrat ini akan berjaya menelurkan suatu rangka kerjasama yang kekal, berkesan dan yang benar-benar menguntungkan kedua belah pihak. Tentulah dalam melahirkan bidang kerjasama yang demikian rupa bidang-bidang agama, kebudayaan dan pendidikan akan terus mendapatkan

perhatian. Sumbangan kerjasama di bidang-bidang tradisional ini kepada penjalinan semangat persaudaraan Islam antara rakyat-rakyat negara Teluk dan negara ini bukan kecil. Secara tidak langsung pemergian lebih 20,000 warganegara kita ke Mekah dan Madinah untuk menunaikan fardu haji setiap tahun itu adalah suatu jaminan kekal yang akan terus memupuk dan menyegari semangat persefahaman dan persaudaraan kita.

Tetapi perhatian juga perlu ditumpukan kepada soal memperkuat hubungan kerjasama yang boleh melahirkan faedah ekonomi dan praktik yang lebih bermakna, terutama di bidang-bidang pelaburan, pertukaran teknologi dan perdagangan. Di peringkat negara, dan rantau (Majlis Kerjasama Teluk — Asean), peluang untuk menaja dan memperluas kerjasama berasaskan faktor-faktor ini adalah terbuka luas. Malaysia sebagai pengeluar bahan-bahan utama (getah, bijih timah, sawit, balak) sedang

giat membangun industri-industri berat berasaskan sumber-sumber asli ini. Kita juga perlukan modal dan pasaran untuk barangan yang kita keluarkan.

Negara-negara Teluk pula dengan hasil minyaknya yang lumayan — ditaksirkan akan mencapai angka AS\$150 bilion dan lebih pendapatan sebanyak AS\$50 bilion untuk tahun ini — memerlukan pelung pelaburan yang boleh menjamin masa depan mereka. Malaysia menyediakan berbagai insentif yang menarik di bawah peruntukan taraf perintisnya kepada pelabur-pelabur asing. Oleh itu, dengan memberikan isi dan nadi kepada konsep pelaburan segitiga yang dikemukakan oleh Perdana Menteri di Bahrain itu — teknologi dari negara maju, modal pelaburan dari negara-negara Teluk dan sumber-sumber asli dan usaha dari negara kita — cita-cita membina kerjasama yang lebih teguh dan berfaedah kepada kedua pihak itu akan menjadi kenyataan.

Bahan asal dari Arkib  
Negara Malaysia